

宋本唐人小集



劉滄詩集

長洲懷古

野燒原空盡荻灰吳王此地有樓臺千年事往
人何在半夜月明潮自來白鳥影從江樹沒清
猿聲入楚雲哀停車日晚薦蘋藻風靜寒塘花
正開

經煬帝行宮

此地曾經翠輦過浮雲流水竟如何香銷南國
美人盡怨入東風芳草多殘柳宮前空露葉夕
陽川上浩煙波行人遙起廣陵思古渡月明聞

棹歌

春日遊嘉陵江

獨泛扁舟映綠楊
嘉陵江水色蒼蒼
行看芳草故鄉遠
坐對落花春日長
曲岝危檣移渡影
暮天栖鳥入山光
今來誰識東歸意
把酒閑吟思洛陽

秋日山齋書懷

啓戶清風枕簟幽
虫絲吹落掛簾鉤
蟬吟高樹雨初霽
人憶故鄉山正秋
浩渺兼葭連夕照
蕭疎楊柳隔沙洲
空將方寸荷知己
身寄煙蘿恩

未酬

晚秋洛陽客舍

清洛平分兩岸沙
沙邊水色近人家
隋朝古陌銅駝柳
石氏荒源金谷花
庭葉霜濃悲遠客
宮城日晚度寒鴉
未成歸計關河阻
空望白雲鄉路賒

深愁喜友人至

不避驅羸道路長
青山同喜惜年光
燈前話舊草夜月下
醉吟谿樹霜落葉已
經寒燒盡衡門猶對
古城荒此身未遂歸
休計一半生涯寄

岳陽

秋日望西陽

古木蒼苔墜幾層行人一望旅情增
太行山下黃河水銅雀臺西武帝陵
風入蒹葭秋色動雨餘楊柳暮煙凝
野花似泣紅妝淚寒露滿枝枝不勝

鄴都懷古

昔時霸業何蕭索古木唯多鳥雀聲
芳草自生宮殿處牧童誰識帝王城
殘春楊柳長川迥落日蒹葭遠水平
一望青山便惆悵西陵無主月

空明

題龍僧房

靜室遙臨伊水東，寂寥誰與此身同。
禹門山色度寒磬，蕭寺竹聲來晚風。
僧宿石龕殘雪在，鴈歸沙渚夕陽空。
偶將心地問高士，坐指浮生一夢中。

秋夕山齋即事

衡門無事閉蒼苔，籬下蕭疎野菊開。
半夜秋風江色動，滿山寒葉雨聲來。
鴈飛關塞霜初落，書寄鄉閭人未迴。
獨坐高牕此時節，一彈瑤瑟自

成

江行書事

遠渚蒹葭覆綠苔
姑蘇南望思徘徊
空江獨樹楚山背
暮雨一舟吳苑來
人度深秋風葉落
鳥飛殘照水煙開
寒潮欲上泛萍藻
寄薦三閭情自哀

過鑄鼎原

黃帝修真萬國朝
鼎成龍駕上丹霄
天風乍起鶴聲遠
海霧漸深龍節遙
仙界日長青鳥度
御衣香散紫霞飄
唯留古跡寒原在
碧水蒼蒼空寂寥

秋日寓懷

海上生涯一釣舟，偶因名利事淹留。
旅塗誰見客青眼，故國幾多人白頭。
霽色滿川明水驛，蟬聲落日隱城樓。
如何未盡此行役，西入潼關雲木秋。

江城晚望

一望江城思有餘，遙分野逕入樵漁。
青山經雨菊花盡，白鳥下灘蘆葉疎。
靜聽潮聲寒木杪，遠看風色暮帆舒。
秋期又涉潼關路，不得年年向此居。

宿蒼谿館

孤館門開對碧岑
竹牕燈下聽猿吟
巴山夜雨別離夢
秦塞舊山迢遞心
滿地莓苔生近水
幾株楊柳自成陰
空思知己隔雲嶺
鄉路獨歸春草深

題王母廟

寂寥珠翠想遺聲
門掩煙微水殿清
拂曙紫霞生古壁
何年絳節下層城
鶴歸遼海春光晚
花落閑堦夕雨晴
武帝無名在仙籍
玉壇星月夜空明

留別復本修古二上人

二遠相知是昔年此身長寄禮香煙綠蕪風晚
水邊寺清磬月高林下禪臺殿虛牕山翠入梧
桐疎葉露光懸西峰話別又須去終日關山在
馬前

邊思

漢將邊方背輓輓受降城北是單于黃河晚凍
雪風急野火遠燒山木枯偷號甲兵衝塞色銜
枚戰馬踏寒蕪蛾眉一沒空留怨青塚月明啼
夜烏

登龍門敬善寺閣

獨步危梯入杳冥
天風瀟洒拂簷楹
禹門煙樹正春色
少室雲屏向晚晴
花落院深清禁閉
水分川闊綠蕪平
瑣牕朱檻同仙界
半夜緱山有鶴聲

題王校書山齋

猿鳥無聲晝掩扉
寒原隔水到人稀
雲晴古木月初上
雪滿空庭鶴未歸
藥圃地連山色近
樵家路入樹煙微
棲遲慣得滄浪思
雲閣還應夢釣磯

浙江晚渡懷古

蟬噪秋風滿古隄
荻花寒渡思萋萋
潮聲歸海鳥初下
草色連江人自迷
碧落晴分平楚外
青山晚出穆陵西
此來一見垂綸者
卻憶舊居明月溪

及第後宴曲江

及第新春選勝遊
杏園初宴曲江頭
紫毫粉壁題仙籍
柳色簫聲拂御樓
霽景露光明遠岸
晚空山翠墜芳洲
歸時不省花間醉
綺陌香車似水流

秋日山寺懷友人

蕭寺樓臺對夕陰
淡煙疎磬散空林
風生寒渚白蘋動
霜落秋山黃葉深
雲盡獨看晴塞鴈
月明遙聽遠村砧
相思不見又經歲
坐向松牕彈玉琴

八月十五夜玩月

中秋朗月靜天河
烏鵲南飛客恨多
寒色滿牕明枕簟
清光凝露拂煙蘿
桂枝斜漢流靈魄
蘋葉微風動細波
此夜空亭聞木落
蕙葭霜磧鴈初過

晚春宿僧院

蕭寺春風正落花淹留數宿惠休家碧空雲盡
磬聲遠清夜月高牕影斜白閑吟爲道侶青
山遙指是生涯微微一點寒燈在鄉夢不成聞
曙鷄

懷汶陽兄弟

回看雲嶺思茫茫幾關河隔汶陽書信經年
鄉國遠弟兄無力海田荒天高霜月砧聲苦風
滿寒林木葉黃終日路岐歸未得秋來空羨鴈
成行

題天宮寺閣

丹闕侵霄壯復危排空霞影動簷扉城連伊水
禹門近煙隔上陽宮樹微天歛暮雲殘雨歇路
穿春草一僧歸此來閑望更何有無限清風生
客衣

遊上方石窟寺

苔徑縈迴景漸分翛然空界靜埃氛一聲疎磬
過寒水半壁危樓隱白雲雪下石龕僧在定日
西山木鳥成群幾來吟嘯立朱檻風起天香處
處聞

懷江南友人

久絕音書隔塞塵路歧誰與子相親愁中獨坐
秦城夜別後幾經吳苑春湘岸風來吹綠綺海
門潮上沒青蘋空勞兩地望明月多感斷蓬千
里身

題敬亭山廟

森森古木列巖隈迥壓寒原霽色開雲雨只從
山上起風雷多向廟中來三江入海聲長在雙
鶴啼天影未迴花落空庭春晝晚石牀松殿滿
青苔

經麻姑山

麻姑此地鍊神丹
寂寞煙霞古竈殘
一自仙娥歸碧落
幾年春雨洗紅蘭
帆飛震澤秋江遠
雨過陵陽晚樹寒
山頂白雲千萬片
時聞鸞鶴下仙壇

對殘春

楊花漠漠暗長隄
春盡人愁鳥又啼
髣髴近來生處白
家園幾向夢中迷
霏微遠樹荒郊外
牢落空城夕照西
唯有年光堪自惜
不勝烟草日萋萋